

Visoki predstavnik kaznio političke stranke u Hercegovačko-neretvanskom kantonu zbog neformiranja Vlade

Skoro osam mjeseci od održavanja općih izbora politički akteri u Hercegovačko-neretvanskom kantonu i dalje stavljaju svoje pojedinačne i stranačke interese ispred interesa građana.

To predstavlja jasnu zloupotrebu povjerenja birača i građana općenito. Isključivo zbog neodgovornog ponašanja političkih stranaka Vlada Hercegovačko-neretvanskog kantona još uvijek nije formirana.

Vrijeme je da preuzmu odgovornost za svoju neaktivnost te je zbog neformiranja Vlade visoki predstavnik Christian Schwarz-Schilling danas izrekao niz novčanih kazni za četiri političke stranke u Hercegovačko-neretvanskom kantonu.

Političke stranke koje će biti novčano kažnjene su one stranke koje su odgovorne za ovaj propust, tj. HDZ BiH, HDZ 1990-HZ, SDA i SBiH.

Odlukom visokog predstavnika suspendirane su isplate sredstava namijenjenih financiranju političkih stranaka za HDZ BiH, HDZ 1990-HZ, SDA i SBiH, i to iz budžeta Bosne i Hercegovine, budžeta Federacije Bosne i Hercegovine i budžeta Hercegovačko-neretvanskog kantona, počevši od 1. juna 2007. godine. Ova suspenzija sredstava će ostati na snazi sve dok kantonalna Vlada ne bude formirana.

Drugo, financijska sredstva koja još uvijek nisu isplaćena iz

budžeta Hercegovačko-neretvanskog kantona za 2007. godinu biće umanjena za 40% za HDZ BiH i SDA i 20% za HDZ 1990-HZ i SBiH. Umanjena sredstava će biti isplaćena tek nakon što se formira vlada.

Ukoliko Vlada Hercegovačko-neretvanskog kantona ne bude formirana do 7. juna 2007. godine sredstva planirana za financiranje političkih stranaka u 2007. godini, koja tek trebaju biti isplaćena ovim političkim strankama u Hercegovačko-neretvanskom kantonu, svake sedmice će biti umanjivana za dodatnih 20 %, sve dok se ne formira kantonalna Vlada.

Nadalje, ukoliko kantonalna Vlada ne bude formirana do 28. juna 2007. godine, visoki predstavnik zadržava pravo da donese dodatnu odluku o smanjenju sredstava za financiranje političkih stranaka iz budžeta Federacije BiH, odnosno sa državnog nivoa.

Prema Odluci visokog predstavnika sredstva od novčanih kazni će biti uplaćena staračkim domovima, sirotištima i ustanovama koje se brinu o djeci s posebnim potrebama u Hercegovačko-neretvanskom kantonu, kao dodatna sredstva za financiranje njihovih konkretnih projekata nezvanično povezanih sa financiranjem njihovih svakodnevnih potreba.